

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 37/7

29 նոյեմբերի 2016թ.

Քննարկվեց «Ռուժ Բուտե» ՍՊԸ գանգատը ՀՀ ԿԱ ՊԵԿ Խոշոր հարկ վճարողների ՀՏ 17.10.2016թ. թիվ 1110194 ակտի դեմ:

«Ռուժ Բուտե» ՍՊԸ գանգատում բերված փաստարկները.

«Ռուժ Բուտե» ՍՊԸ-ն ք.Երևան, Մաշտոցի 16 հասցեում գործունեությունն իրականացնում է վարձակալական հիմունքներով: Ս/թ սեպտեմբերի 23-ին նշված հասցեի 2-րդ հարկում գտնվող վարչական տարածքի առաստաղը՝ 3-րդ հարկի բնակչի կոյուղու անսարքության պատճառով վնասվել էր: Առաստաղի հարդարման աշխատանքներ իրականացնելու նպատակով հարևանը հրավիրել էր ծեփագործների, որոնք էլ ստուգման պահին կատարում էին առաստաղի հարդարման աշխատանքները: Ստուգող խմբին տրվել է հայտարարություն առ այն, որ վերոհիշյալ անձանց հետ ընկերությունը գրավոր աշխատանքային կամ քաղիրավական պայմանագրեր չունի կնքված և չէր էլ կարող ունենալ, քանի որ ստուգման պահին ընկերության կողմից վարձակալված տարածքում փաստացի գտնվելու փաստն ինքնին չի ենթադրում, որ քաղաքացին հանդիսանում է ընկերության աշխատակիցը, այնպես ինչպես օրինակ Ար-մոբիլ ընկերության անվտանգության ծառայության աշխատակցի կամ Գործք ընկերության կադրային գործավարի ներկայությունն ընկերության վարչական տարածքում:

ՀՀ ԿԱ ՊԵԿ նախագահի 22.09.2016թ. թիվ 1110194 հանձնարագրի համաձայն աշխատողի աշխատանքի ընդունումը ՀՀ օրենսդրությամբ սահմանված կարգով ձևակերպելու ճշտության (առանց գրավոր պայմանագրի (հրամանի) կնքման աշխատող պահելու դեպքերի բացահայտմանն ուղղված) ստուգման արդյունքում ՀՀ ԿԱ ՊԵԿ ԽՀՎ ՀՏ կողմից 11.10.2016թ. թիվ 4844/39-1 գրությամբ ընկերությանը փոստով առաքվել է 07.10.2016թ. կազմված թիվ 1110194 ստուգման ակտի նախագծի մեկ օրինակը: Ստուգման ակտի նախագծի վերաբերյալ 13.10.2016թ. ընկերության կողմից հայտնվել է անհամաձայնություն ներկայացվել հատուկ կարծիք՝ կցելով բնակիչ Էդվարդ Սարգսյանի հայտարարությունն առ այն, որ ծեփագործները հրավիրվել և վերանորոգման աշխատանքների դիմաց վարձատրությունը կատարվել է իր կողմից: Վերոհիշյալ առարկությունը չի ընդունվել ՀՏ կողմից և 17.10.2016թ. թիվ 4880/39-1 գրությամբ փոստով առաքվել է 17.10.2016թ. թիվ 1110194 ակտը:

Հիմք ընդունելով վարչարարության հիմունքների և վարչական վարույթի մասին ՀՀ օրենքի 5-րդ, 7-րդ և 10-րդ հոդվածները, ինչպես նաև 63-րդ հոդվածի 1-ին կետի բ) ենթակետի դրույթները, գանգատաբերը խնդրում է ՀՀ ԿԱ ՊԵԿ ԽՀՎ ՀՏ 17.10.2016թ. թիվ 1110194 ակտը համարել մասնակի անվավեր 2 (երկու) ծեփագործների մասով, իսկ 1 (մեկ) աշխատակցի մասով՝ թողնել անփոփոխ:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ նախագահի 22.09.2016թ. թիվ 1110194 հանձնարարագրի համաձայն «Ռուժ Բուտե» ՍՊԸ-ում կատարվել է աշխատողի աշխատանքի ընդունումը ՀՀ օրենսդրությամբ սահմանված կարգով ձևակերպելու ճշտության (առանց գրավոր պայմանագրի (հրամանի) կնքման աշխատող պահելու դեպքերի բացահայտմանն ուղղված) ստուգում: Արդյունքում կազմվել է ՀՀ ԿԱ ՊԵԿ Խոշոր հարկ վճարողների ՀՏ 17.10.2016թ. թիվ 1110194 ակտը (այսուհետ նաև՝ Ակտ), որով լրացուցիչ վճարման է առաջադրվել 180.000 դրամ:

Ակտի 1-ին կետով մասնավորապես արձանագրվել է, որ «ՀՀ-ում ստուգումների կազմակերպման և անցկացման մասին» ՀՀ օրենքի և ՀՀ կառավարության 25.07.2013թ. թիվ 1259-Ն որոշմամբ հաստատված կարգի համաձայն «Ռուժ Բուտե» ՍՊԸ-ում իրականացված ստուգման պահին ընկերության գործունեության հասցեներում, մասնավորապես՝ ք.Երևան, Աբովյան 22, Գրիբայեդովի 25/25, Արշակունյաց պողոտա 34/3 «Երևան մոլ» 85 տարածք, Ծիծեռնակաբերդի խճուղի Դավա Գարդեն Մոլ 1-ին հարկ 17 տարածք, Հյուսիսային պողոտա 5 182, 6/2, Մաշտոց 16 թիվ 65 տարածք և ք.Վանաձոր, Տիգրան Մեծի 42 հասցեներում գործող մանրածախ իրացման կետերում, պահեստային տարածքում, ինչպես նաև ընկերության վարչական տարածքում փաստացի աշխատանքային գործունեությամբ զբաղված աշխատողների և ընկերությունում նույն պահին գործող աշխատանքային (կամ քաղաքացիաիրավական) պայմանագրերի և աշխատանքի ընդունման հրամանների համադրումից պարզվեց, որ թվով 3 (երեք) վարձու աշխատողների՝ վաճառող-խորհրդատու Էլմիրա Անդրանիկի Դանիելյանի, գրասենյակի ներքին հարդարմամբ զբաղված ծեփագործներ Տարոն Վահանի Հովհաննիսյանի և Գեղամ Ֆրունզիկի Սարգսյանի աշխատանքի ընդունումը ձևակերպված չէր ՀՀ օրենսդրությամբ սահմանված կարգով, այսինքն՝ այդ աշխատողների աշխատանքի ընդունման մասին անհատական իրավական ակտեր կամ վերջիններիս հետ երկկողմանի ստորագրված գրավոր պայմանագրեր բացակայում էին: Այսպիսով, խախտվել են ՀՀ Աշխատանքային օրենսգրքի 14-րդ հոդվածի պահանջները, որի համար կիրառվել է «Եկամտային հարկի մասին» ՀՀ օրենքի 25-րդ հոդվածի 5-րդ մասի «ա» կետով նախատեսված պատասխանատվության միջոցը՝ ընդհանուր գումարով 180.000 դրամ:

Քննարկման ընթացքում պարզվեց, որ «Ռուժ Բուտե» ՍՊԸ-ի ք.Երևան, Մաշտոցի 16 հասցեի 2-րդ հարկում գտնվող վարչական տարածքի առաստաղը վերևի հարկում բնակվող Էդվարդ Պետրոսյանի բնակարանի կոյուղու անսարքության պատճառով վնասվել է: Առաստաղի վերանորոգման աշխատանքներ իրականացնելու նպատակով Էդվարդ Պետրոսյանը հրավիրել է ծեփագործների, որոնք ստուգման պահին կատարել են ընկերության վարչական տարածքի առաստաղի վերանորոգման աշխատանքները: Ընդ որում, գործում առկա է Էդվարդ Պետրոսյանի 11.10.2016թ. գրավոր հայտարարությունը, որում նա մասնավորապես նշել, որ իր բնակարանում տեղի է ունեցել կոյուղու վթար, որի արդյունքում զգալիորեն վնասվել է «Ռուժ Բուտե» ՍՊԸ-ի վարչական տարածքի առաստաղը: Իր հայտարարությունում Էդվարդ

Պետրոսյանը նշել է նաև, որ պայմանավորվածություն է ձեռք բերել Տարոն Հովհաննիսյանի հետ համապատասխան վճարի դիմաց կատարել ընկերության վարչական տարածքի առաստաղի վերանորոգումը: Առաստաղի վերանորոգման աշխատանքները Տարոն Հովհաննիսյանը սկսել է իրականացնել 27.09.2016թ-ից՝ իր գործընկեր Գեղամ Սարգսյանի հետ միասին:

Ելնելով վերոգրյալ փաստական հանգամանքներից՝ Հանձնաժողովը գտնում է, որ քաղաքացիներ Տարոն Հովհաննիսյանը և Գեղամ Սարգսյանը չեն կարող դիտվել որպես ստուգման ընթացքում «Ռուժ Բուտե» ՍՊԸ-ում աշխատանքային գործունեություն իրականացնող, սակայն ՀՀ օրենսդրությամբ սահմանված կարգով չձևակերպված վարձու աշխատողներ:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ Խոշոր հարկ վճարողների ՀՏ 17.10.2016թ. թիվ 1110194 ակտի 1-ին կետով առաջադրված եկամտային հարկը նվազեցնել 120.000 դրամով:

Հանձնաժողովի նախագահ՝



Վ.ՄԻՐՈՒՄՅԱՆ